


新刊權載之文集 二

宋蜀刻本唐人集



本社編

宋蜀刻本唐人集



YZLI0890174400

第十四册

權載之文集卷第二十三

墓誌銘

韋公墓誌銘

韋君墓誌銘

羅公墓誌銘

周君墓誌銘

裴君墓誌銘

唐故太常卿贈刑部尚書韋公墓誌銘

并序

維貞元十七年秋七月乙酉太常韋公諱渠年五十
三啓手足于靖恭里戊子詔書以大司寇印綬告第其
孤博古近古等號咷崩慕以冬十一月甲子薨與蔡叶
吉窆于某原其徽數用天子之追命其誠儉用先人之

理命旣而續書出處之義行官業請斷園石藏於塋內
玄公字某京北杜陵人自楚元王傳漢丞相節侯恭侯
而下其族盛大天爵人爵沛然兩集六代祖範隨郾城
莊公曾祖餘慶皇坊州刺史祖景駿房州刺史父冰著
作郎兼蘇州司馬同氣齊名皆以文學論著爲賢卿大
夫而著作志氣閎邁落落有奇節公即第若干子也年
十二善賦詩屬書未弱冠博極今古尤精史籍力行過
人且以爲夫子在魯則衣縫掖在宋則冠章甫范蠡在
陶爲朱公在齊爲鳴夷子皮於是傳心印之法於金陵
授谷神之道於華陽或爲塵外人或爲遺名子其達觀
也不名一行其玄同也會歸三教蓋周流揭厲無入而
不自得焉終以儒服服素王之道大曆末丁著作府君

憂倚廬于壤樹之側以純孝感嘉生廉車列上州閭登
敬身元二年起家拜校書郎五年轉左武衛騎曹掾皆
爲知己者從事八年大成均表其名經可領學徒遷四
門博士十二年夏承詔與近臣名儒緇黃大士講議於
麟德殿上以爲能拜秘書郎尋獻詩七百字極其文采
歲中歷右補闕左諫議大夫再當言責之地切劘獻替
數進熟於君規事建議颺起鋒出卓犖頡頑取重於時
三接日旰公卿仰其風采薦巖穴有道之士以待兩言
其他推轂皆一言感槩就義若渴見不善如探湯與夫
陰拱自愛持容容之計者固爲愈矣間一歲遷太府卿
錫以命服又間一歲遷太常卿泉藏受用之法絲絃禮
文之事峻科禁以絕其私酌儀制而合于中被病乞告

禮愈優而不得請壽與忘皆未極而歿悲夫公敏於歌
詩縟采綺合大凡文集若干卷撰莊子會釋老子金剛
經釋文孝經維摩經疏三教會宗圖共十餘萬言又奏
修身元新集開元後禮二十卷詔下有司令行於代當
其憫坐馳哀弱喪也泛然若不囿於物及披肝膽承顧
問也毅然若不有其身起儒官博士十三年踐文石
登玉堂赤車金印燠灼中外其所以得之者無他腸故
也禮器曰觀其發而知其人之智洪範曰俊民用章噫
嘻太常之道其智而俊歟雅爲晉國韓公魯郡顏公之
所薦寵魯公常稱遺名字洞澈三教讀佛書儒書道書
向三萬卷又多言其神奇之跡今茲不書姑書其章明
弘大者用識窳窳一以申嘗僚之義一以遂孝子之心

其銘曰

儒有奉常兮旁貫三玄強志敏心兮詞義紛綸初委約
以卷懷終發舒而顯尊出四門兮登三閣居保氏兮諤
諤開智囊以當法座印纍纍而綬若若天衢凌厲兮才
較群艾服官政兮年中身颺截道兮駟過隙夫何一氣
聚散之汭汭逝者固不可作兮鏤貞堅于墓門

唐故朝議大夫太子右庶子上柱國賜紫

金魚袋韋君墓誌

君諱聿字某京兆杜陵人六代祖郿城莊公範有勲力
於周隋間範之孫機實居大農艱貞忠厚書在國史機
之孫贈太子少保岳八子爲二千石皆有風績生贈太
子太師賁仕至藍田尉清方粹遠天爵自修有才子四

人君爲冢嗣承少保太師祖禰之慶故延耀發舒於君
伯仲之間少開敏有才智通覽書記不爲章句儒天寶
中以門子奉清廟齋祠試言會府補宣州南陵尉歷揚
州天長丞越州兵曹掾涇原節將表爲叅謀以廷尉平
攝監察御史未及行授楊州錄事叅軍尋爲本府薦拜
秘書郎兼殿侍御史以官名心瞿換太子司議郎俄擢
侍御史檢校祠部員外郎皆爲淮南從事貞元十二年
徵爲水部員外轉比部郎中德宗召見錫以金紫命服
俄遷衛尉少卿國子司業用久次拜右庶子元和三年
九月景成以官壽歿於長興里春秋七十五君初筮仕
已辯疑擿伏全治枉濫厥後率爲守臣薦引歷丞史紀
綱掾皆以理効聞自簪法冠贊戎重或筦府政以脩吏

理若操號鍾而揮孟勞度音觸物非輩類所及所奉之主即故居守杜扶風公今司徒岐公其人也介弟太尉南康忠武王有大烈於王家同氣致美士林景行不乘勢以燠灼每虛懷而坦蕩再爲尚書郎業以修計部稽百事財用之數嘗欲覆視禁軍董正其簿書雖事適中正而聞者竦嘆洎佐師氏相東朝克詳憲令以中宜適朝請休沐或近郊考勝漢廷臣賢士大夫車常接轂必釀酒理具懽怡晏晏交有久要而言無瑕謫平夷疏達造適遺累有君子之槩焉與夫拘攣枯槁局束於一代者異曰論也素強力無疥痂奄忽廢手足庸距知非五福之康寧以考終命耶岐公以元老總國柄每退朝清問曰與君宴言一旦相失涕洟怛化夫人棗陽縣君鄭

氏某官某之女淑溫仁順爲六姻法凡合體若干年先
於君歿者半歲嗣子行檢進士第自協律郎移朗州司
戶有文業爲素藝器幹次行業行脩皆脩詞與計偕次
某等顓經術某等尚幼女子有行者四人在祿抱者三
人子壻某官某某官某等皆華宗良幹匍匐會事行檢
等令龜揲筮得十月某甲子吉以德輿同辟公府周知
所履將琢圓石見咨直書銘曰

桂陽之系郢城之裔伊上族兮亞千大僚相彼東朝介
豐福兮吉凶糾纏以息斯不淑兮直城南徧即遠歸全
覆夏屋茲焉追琢以識其實表陵谷兮

唐故太中大夫守太子賓客上柱國襄陽縣
開國男賜紫金魚袋羅公墓誌銘

并序

公諱珣其先會稽人蜀廣漢太守蒙晉西郢鄧侯璽給事中龔皆以茂績焯於前載曾祖彥榮皇同州長史祖思崇韶睦常三州刺史父懷操桂州興安縣令贈華州刺史實有清行藏於家諫公蚤孤貧篤志好學舅氏徐吏部浩器以遠大以其兄之子妻之實應初上書言事廷命太祝由吏資轉長水河南二縣尉萬年主簿分董計司相中之賦授大理司直嗣曹王以宗室吏師節制洪荆襄三府公皆贊其師律歷監察御史殿中侍御史祠部員外郎府除徵為奉天令刺廬壽二州就加御史中丞入為司農卿京兆尹移疾乞告改太子賓客凡莅十六官考績四十四年弘厚有局度辨論通吏事敏而文忠而能力緣飾楨幹所居可紀初結綬蒲歲調於有

司會舅氏居選部上其名於宰府試言二篇比興菁華
及賓曹邛兼筦書奏下安陸應山露布於朝矢石雨下
含章吐發介漢南也武人因府喪以刳軍實譴張無狀
公立斬首惡十餘曹且命環棘於廷俾投所取以貫非
間一日而金幣皆復微公之材則一方幾亂其宰陵邑
內官旁午吏有曰緣橫猾以犯禁者榜笞至死人用知
懼凡田里之闕庸亡之俸皆倍於始至而不書於籍廬
江劇部號爲難理強家占田而婁人無告鄉校廢落而
冗吏猥多被病者捨醫事求淫祀公皆去其弊而圖其
利人人得盡四支之敏而務十全之術修起經師弟子
以理庠塾每歲以廉茂計偕者倍於他邦化條簡易和
氣浹洽靈芝產白雀王連率令司徒岐公上其理狀詔

錫金紫命服壽陽與蔡人接壤有州師萬數天子命中
貴人監理視方任焉訓武備飭文事嚴重廉清理行第
一入以材能爲九卿典司金穀由朱邑之課第循手黜
之事任其尹京轂不施鈎距嘗請減縣內平糴之半且
以嘗賦輸於公上者充焉精力惠養人蒙其利前史稱
吏不廉平則理道衰旋觀天人之所莅有以見朝廷理
道之所繇也年耆疾癯乃喟然曰吾以澤國書生累至
二千石居大農內史止足休老其在茲乎拜章數上雖
處以諸賓優秩而不得謝以元和四年冬十一月啓手
足於宣平里之私第逾縣車者四歲夫人東海徐氏同
州司馬叅軍浚之息女婦道柔正不躋偕老嗣子讓鄉
舉進士博學宏詞能直言極諫三登甲科爲校書郎咸

陽縣尉毀瘠孺慕如不欲生號奉輜車以某日歸祔
于會稽之北域以德興與公同服大僚頃歲奉行中執
法之詔又嘗讀亡友楊懋功刻金石遺愛之說公之率
履固為周知識諸宅安不敢辭也銘曰

懿彼君子兮有猷有守其心不回兮其進不苟中外賦
政兮人之父母金艾被體兮華纓耀首月在子兮歲居
丑復東轍榮兮寢北牖火蔽列兮纁玄紉歸鮮原兮巾
廣柳丘夷谷變兮何不有追琢貞堅兮天地久

唐故朝散大夫守祕書少監致仕周君墓

誌銘 并序

君諱渭字北師其先汝南人六代祖衡仕隋為淮陰郡
司馬子孫因家焉曾祖頂皇杭州長史祖守則婺州金

華公父隨州棗陽令三業沉疴纓轂未華皆以義行稱
於州里君服儒篤學工爲詞賦大曆末常潘繼居小宗
伯號爲得士君與令弟澈聯中正鵠於二有司之下是
歲孝文帝嗣大統詳延諸生又以身師伐謀對有明法
授汝州襄城尉時太傅崔文貞公以匪躬當國兼綜書
殿表爲校理歷富平長安尉拜監察御史董選補于南
方南方吏理清而風俗阜柳君是賴復命其勞轉殿中
侍御史平理詔獄清公不苛遷膳部貳外郎祠部郎中
典曹草議遵道循性居太微積星之位十年不徙官其
有據利權大竇燠灼於時者君必畏而遠之居易自是
前歲凶旱詔罷郡國選墾慮轂下艱食之不給也君抗
疏以爲無肆眚且久得非濫刑失職者含冤以墊和氣

邪臣以爲咎於天戒者在此不在彼雖留中不下而士
友多之上皇踐阼章叙時雋君已感疾拜章請老有詔
授祕書少監以優遂之先築室于崇德里有嘉樹脩竹
休沐吟咏以文自娛每得一佳句如獲言祿恬於進取
用此故也赤紱華髮燕居考祥方蓄精神以順和理永
貞元年冬十一月甲戌奄然大病以啓手足春秋六十
六夫人河東薛氏將作監丞腹之女雅有儀操有子三
人從魯從禮從質克稟風訓以明年二月某甲子號奉
裳惟返葬于絳山縣唐興鄉之北原刻石銘墓以昭景
行銘曰

猗歟周君探六義思無邪詞頗類安又次服郎吏謝淳
榮佐中祕洛師絳原潛厚地刻勒貞珉書此誌

唐故正議大夫衛尉少卿聞喜縣開國伯

賜紫金魚袋裴君墓誌

并序

君諱會字某河南聞喜人有唐元老右僕射贈司空貞孝公之元子惟司空左右肅宗壽與位侔百順五福且鍾厥後雖不能嗣居公相者必用攸好德考終命焉君孝悌睦友慎厚敬讓直而和柔而不犯馴行克家學古入官乾元初筮仕太常授奉禮郎再轉至主簿廣德初以宰相子行修飾特加正議大夫累登東朝為中舍人率更令仍副少府又貳殿中今司徒北平王之節制河東也表為戎佐檢校吏部郎中貞元元年旱蝗相乘列郡災耗君奉府檄莅于定襄勞徠安集有異等之効就加金印紫綬以疇其能五年從北平朝京師真拜膳部